

Aruba ta expresa su solidaridad cu Senador Colombiano Miguel Uribe despues di intento di asesinato

PROME Minister mr. Mike Eman y su esposa Doina, den nomber di Gobierno di Aruba, ta expresa nan mas profundo y sincero sentimento di solidaridad y preocupacion na e famia di Senador Miguel Uribe di Colombia, despues di e lamentabel atentado contra su bida.

E atentado aki a conmove e comunidad di Aruba profundamente. Un atentado contra un lider democratico no solamente ta un dolor personal pa su famia, pero tambe un herida na e balornan democratico cu nos tur ta comparti como pueblo y como region. "Awe, nos ta sinti e sufrimento hunto cu su famia y cu henter e pueblo Colombiano". Prome Minister a expresa.

Nos ta pidi Dios pa duna fortaleza, paz y consuelo na Senador Uribe, su sernan keru y su comunidad. Nos ta haci oracion pa su pronto y completo recuperacion. Ta hopi importante pa nos, como pueblo Arubano, muestra cu

nos ta un pueblo solidario, cu ta para hunto cu otro pueblo den momentonan dificil.

Prome Minister Mike Eman a tuma contacto cu e Consul General di Colombia na Aruba, sr. Gustavo Serrano Amaya, pa expresa di manera oficial e apoyo y cariño di e pueblo Arubano. E mensahe ta cla: Aruba ta para solidario na banda di su pueblo ruman di Colombia.

Gobierno di Aruba ta rechasa categoricamente tur forma di violencia, y mas ainda ora violencia ta purba pone obstaculo na e yamada democratico di lidernan cu ta traha den nomber di nan pueblo. Mester defende democracia cu palabra, accion, y cu union.

Cu Dios fortalece Miguel Uribe, consola su famia y guia nos tur riba un caminda di speransa comprension y respeto mutuo.

A.T.A. ta sigui apoya socionan hotelero na beneficio di Aruba

Secrets Baby Beach a yama bonbini na su prome huespednan

DIFERENTE ekipo di A.T.A. a traha di cerca cu e hotel nobo Secrets Baby Beach. Tambe tin varios cu a haci un recorrido caba. Diabierna ultimo Ronella Croes, CEO di Aruba Tourism Authority, hunto cu varios colega a bishit'e, un dia despues cu Secrets a habri su portanan. Por a mira e hotel den accion.

Durante e recorrido tabata t'ey presente Jose Maria Perez de Ureta, gerente general di e hotel, Fernando Vega, director financiero y Ricardo Portillo, como director comercial. Di parti di A.T.A. tabat'ey Ronella Croes, Maas van Drie, Patrick Melchiors y Gemey Zara.

A muestra nan e cambarnan, SPA, gym, e diferente restaurantnan y otro facilidanan di e hotel.

Secrets Baby Beach by Hyatt a habri su portanan oficialmente diahuebs dia 5 di juni ultimo. E ta un 'soft opening' permitiendo e propiedad pa test, mehora y gradualmente ricibi mas bishitante. Riba e prome dia a yama bonbini na 52 camber, di dos dia el a bira 80, di tres dia 90 y despues di cuater dia ta surpasa 100 camber





te yega 40% di e ocupacion total.

E partner nobo aki di Aruba den e pilar principal di nos economia, ta mustrandonan nan compromiso pa calidad. Grupo Martinon, di Spaña, tin propiedad na Republica Dominicana y Mexico tambe y Secrets by Hyatt ta nan prome aki na Aruba. Secrets by Hyatt ta un proyecto di 160 milyon dollar.

A.T.A. a tuma nota di e cantidad grandi di empleadonan cu ta di e area di San Nicolas. Tambe por a nota clientela mixto, esta di diferente pais. Algun a bishita como clientenan fiel di Secrets y



algun otro ta cliente fiel di Aruba cu kier hospeda na e otro banda di e isla.

A dialoga hopi riba e necesidad di maneha e fluho di bishitante debidamente, subrayando e inversionnan haci den e zona aki (Baby Beach, Rodger's Beach entre otro) y tambe locual tin intencion pa continua cu ne.

Pero tambe a subraya e echo cu ta importante mantene e caracter unico di San Nicolas cu e acento riba proteccion y asistencia di e cadena di Secrets den esaki tambe. A.T.A. ta comprometi pa sigui brinda asistencia pa cu e area di San Nicolas, tambe pensando aki riba e centro di e ciudad.

A remarca tambe cu e ultimo hotelnan cu a habri, esta Joia, St. Regis y Secrets ta amplia e posicion di Aruba den e segmento di esnan cu ta busca biahe di luho. E interes y demanda den e productonan nobo aki ta grandi.

Ta gradici gerencia pa e recepcion y ta felicita y desea e ekipo completo, hopi exito!

Tocante Secrets Baby Beach Aruba

Tabata na november 2019 cu AMResorts®, un compania di Apple Leisure Group® (ALG), a anuncia un acuerdo nobo pa construcion di 600 camber pa e proyecto Secrets Baby Beach Aruba situa cerca di Baby Beach, na San Nicolas, como parti di e cadena di Secrets® Resorts & Spa. E grupo tras di e proyecto ta Grupo Martínón, estableci na Aruba via e compania Three Rivers Real Estate VBA.

E hotel ta destina solamente pa adulto y lo ofrece e concepto conoci como un vakantie exclusivo "Unlimited-Luxury®", cu ta cubri tur e opcionnan di cuminda y servicionan den e hotel, cu ta inclui oferta di cuminda estilo "gourmet a la cart" sin reservacion, servicio di cambenan y roomservice 24 ora pa dia, bebida sin limite, mini bar den camber, actividadnan y entretenimiento nocturno "live".

Y tur e servicio y actividadnan aki ta inclui, pues no mester ni sali cu tas of cartera!

E grupo Apple Leisure Group® (ALG) ta un di e companianan principal di tours, biahe y hospitalidad di Merca. Via su compania AMResorts® nan a desaroya of ta desaroyando proyectonan hotelero grandi den Caribe.

Siendo un compania reconoci como un lider den e mercado di hotelnan "All Inclusive", awendia AMResorts® ta maneha 66 hotel di e marca aki cu como 9000 camber den pleno desaroyo.

E compania ta posee como 24000 camber bou varios marca di hotel na Mexico, den Caribe, Merca y Spaña.